



# 15

Niining Leksyona Matun-an Mo Kini

Si Jesus Mao ang Matuod nga Punoan  
sa Parras

Ang Pagdumot sa Kalibutan

## SI JESUS MAO ANG MATUOD NGA PUNOAN SA PARRAS

(Basaha ang Juan 15:1-17)

Si Jesus naga-indig sa iyang kaugalingon sa usa ka matuod nga punoan sa paras ug ang Iyang mga tinun-an mao ang mga sanga. Ang Iyang kinabuhi dinhi kanato nagabunga ug bunga sa Espiritu Santo. Mao kining matang sa bunga ang buot sa Dios ma kita sa atong kinabuhi.



**G**alicia 5:22-23. Apan ang bunga sa Espiritu mao ang gugma, kalipay, kalinaw, pailub, pagkamapuangoron, pagkamaayo, pagkamati-numanon, kaaghop, pagpugong sa kaugalingon; nga sa maong mga butang walay kasugoan nga kabatok,


Ang matag hardenero nag-atiman o nagahinlo sa maong parras. Putlon niya ang patayng mga sanga aron mutobo ang gagmayng mga sanga nga magabunga ug mga parras.

Miingon si Jesus nga ang Iyang mga tinun-an nahinloan pinaagi sa Iyang pulong. Gigamit sa Dios ang Biblia ingon nga Iyang kutsilyo aron paghinlo o pagputol sa mga dautang butang nga anaa sa atong kinabuhi. Sama sa atong kahakug, garbo, ug dautang batasan. Samtang magabasa kita sa Biblia, toohi, ug dawata ingon nga maoy sumbanan sa atong kinabuhi. Magatabang ang Espiritu Santo kanato sa pagbiya sa mga dautang kinaiya. Unya ang madagayaong kinabuhi ni Cristo sama sa tuburan nga magadagayday gikan

sa punoan sa kahoy ngadto sa mga sanga. Ug kini nagahatag ug bunga, ang bunga sa Espiritu.

Ang pulong “pabilin” gibalikbalik sa makadaghan niining kapituloha nga anaa sa bersikulo 4, 5, 6, 7, 9, ug 10. Kini importante kaayo. Kon ang usa ka sanga mobiya gikan sa punoan kini gayud mamatay tungod kay ang kinabuhi niini nagagikan man sa maong punoan. Sa ingon man usab ang atong espirito hanong kinabuhi nagaagad sa atong pagkadugtong ngadto kang Jesu-Cristo. Samtang magapadayon kita sa pagpabilin diha kang Jesus, aduna gayud kitay kinabuhi. Apan kon togutan nato ang ubang butang nga makapahilayo kanato gikan ni Jesus ug mobalik kita ngadto sa sala, nan mawala gikan kanato ang kinabuhi.

**Juan 15.5.** “Ako mao ang tanum nga parras, kamo mao ang mga sanga. Ang magpabilin kanako, kang kinsa magapabilin ako, mao siya ang magapamungag daghan, kay gawas kanako wala gayud kamoy arang mahimo.”



Makita nato niining kapituloha nga ang nagdugtong taliwala sa magtotoo ug kang Jesus mao ang gugma. Ang pulong “gugma” gigamit labaw sa treinta ka dapit diha sa bersikulo 13 ngadto sa 17. Una nagahisgut si Jesus kon giunsa Siya paghigugma sa Iyang Amahan. Ug unya kon giunsa Niya paghigugma ang Iyang mga tinun-an. Ug nga ang Iyang mga tinun-an magapadayon diha sa Iyang gugma.

Samtang magapabilin kita kang Jesus magatabang Siya kanato sa paghigugma sa usa ug usa. Usahay moingon kita nga higugmaon nato ang tawo kon maayo siya kanato. Apan si Jesus wala mahigugma kanato tungod kay angay kitang higugmaon. Siya nahigugma ug nagpakamatay kanato sa dihang makasasala pa kita. Gipili Niya kita aron pagpakita sa kalibutan sa Iyang kinabuhi ug sa Iyang gugma alang kanato. Basaha ang bersikulo 16.

#### Buhata Kini

1. Sag-uloha ang Galacia 5:22, 23 ug Juan 15:5.
2. Sa unsa man gipakasama ni Jesus ang Iyang kaugalingon ug ang Iyang mga tinun-an?
  - . . . a) Sa usa ka umahan ug iyang mga bunga.
  - . . . b) Sa usa ka punoan sa parras ug iyang mga sanga.
  - . . . c) Sa usa ka agalon ug ang iyang ulipon.
3. Unsa may kahimoan sa mga pulong ni Jesus sa atong kinabuhi?
  - . . . a) Magahimo kanato nga hinlo kon magadawat kita ug magatuman niini.
  - . . . b) Kon mobasa kita sa Biblia ang atong kinabuhi mahimong hinlo,
  - . . . c) Walay mahimo bisan unsa.
4. Unsa may atong mabuhat kon wala si Jesus?
  - . . . a) Dagku pang mga butang kay sa mga gibuhay ni Jesus
  - . . . b) Magapamunga ug daghan.
  - . . . c) Wala.
5. Asa gipasikad ang panagdugtong sa magtotoo ug kang Jesus?
  - . . . a) Gugma . . . c) Maayong buhat.
  - . . . b) Pagpasakop sa Simbahan.

## ANG PAGDUMOT SA KALIBUTAN

(Basaha ang Juan 15:18-27)

(Basaha ug Juan 16:1-4)



Nagasulti si Jesus mahitungod sa mga paglutos ug mga pagsulay nga ilang antuson dinhi sa kalibutan. Sa napulog usa ka mga tinun-an ni Jesus nga Iyang gisultihan niining mga pulonga, napulo kanila pagapatyon tungod sa pagwali sa ebanghelyo. Si Juan lamang ang mamatay sa kasa garang kamatayon.

Nganong gidumtan man sa kalibutan kadtong mga nagasunod kang Jesus? Sa mao ra usab nga hinungdan nga sila nagadumot kang Jesus. Ang maayong kinabuhi sa usa ka matuod nga Cristohanon nagapakita kon unsa ka dautan ang mga nagalibot kaniya. Nagapabati kini sa mga makasasala nga labaw pang makasasala. Kini maoy nagadasig kanila sa pagdumot sa mga Cristohanon ug nagabuhat sila sa bisan unsa nga batok sa mga Cristohanon.

Ug si Satanas usab nga kaaway sa Dios, nagapakig-away batok sa mga Cristohanon. Nagadasig siya sa mga katawhan sa pagbugalbugal ug pagbiay-biay sa mga Cristohanon. Busa ayaw katingala kon ang mga tawo magabugalbugal o magalutos kanimo tungod nga anaa ka na kang Cristo. Ang ubang mga Cristohanon ginakastigo sa ilang mga ginikanan. Ang uban gipabilanggo ug ang uban usab gipatay tungod lamang kay

midawat sila kang Cristo ingon nga ilang Manluluwas.

Miingon si Jesus nga ang Iyang mga magsusunod dili molabaw Kaniya. Kon ang kalibutan nagalutos Kaniya nan magalutos usab sila sa matag usa nga musonod Kaniya.

Misaad usab si Jesus mahitungod sa usa ka Magtatabang nga mao ang Espiritu Santo. Ang Espiritu Santo magasulti ug daghan pa mahitungod kang Jesus ug usab magatabang sa mga tinun-an sa pagsulti ngadto sa uban mahitungod kang Jesus.

#### Buhata Kini

6. Pag-ampo alang sa mga nagaantus sa paglutos.
7. Unsa may gisaad ni Jesus nga Magtatabang?
  - . . . a) Nagasaad Siya kanila ug mga higala nga magatabang kanila.
  - . . . b) Nagasaad Siya kanila ug usa ka mag-uuma nga magahatag kanila ug bunga gikan sa punoan sa parras.
  - . . . c) Nagasaad Siya kanila ug Espiritu Santo.
8. Itandi ang imong mga tubag sa hustong mga tubag nga anaa sa katapusan niining leksyona.
9. Sulati ang imong Rekord sa Estudyante alang sa ika-15 nga leksyon.

## Ang mga Tubag sa Ika-15 nga Leksyon

Kon aduna kay 5 ka hustong mga tubag markahi ug labing maayo, kon 4 markahi ug maayo, kon 3 ra kasarangan. Ug kon kubos sa 3 ang imong hustong tubag basaha pag-usab kining leksyona.

2. b) Sa usa ka punoan sa parras ug Iyang mga sanga.
3. a) Makahimo kanato nga hinlo kon magadawat kita ug magatuman niini.
4. c) Wala.
5. a) Gugma
7. c) Nagasaad Siya kanila ug Espiritu Santo.

Gidaghanon sa hustong mga tubag \_\_\_\_\_

Grado \_\_\_\_\_